

Aningaasalersuineramik ingerlataqarneq pillugu inatsisip allangortinnissaa pillugu inatsisip aamma aningaasalersuisarnermi suliffiit ilaasa allatut ilusilersornissaat atorunnaarsinnissaallu pillugu inatsisip Kalaallit Nunaannut atuutsinnissaa pillugu peqqussutinik Namminersorlutik Oqartussat akuersinissaat pillugu Inatsisartut aalajangiiffigisassaattut siunnersuut.

Inuussutissarsiornermut Nukissiuteqarnermullu Naalakkersuisumit saqqummiunneqartoq

pillugu

Inuussutissarsiornermut Aatsitassanullu Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq, Henrik Fleischer, Siumut, Siulittaasoq

Inatsisartunut ilaasortaq, Múte Bourup Egede, Inuit Ataqtigiit, Siulittaasup tullia

Inatsisartunut ilaasortaq, Aqqalu Jerimiassen, Atassut

Inatsisartunut ilaasortaq, Hermann Berthelsen, Siumut

Inatsisartunut ilaasortaq, Randi Vestergaard Evaldsen, Demokraatit

Inatsisartunut ilaasortaq, Peter Olsen, Inuit Ataqtigiit

Inatsisartunut ilaasortaq, Tillie Martinussen, Suleqatigiissitsisut

UPA2019-imi ulloq 28. marts siullermeerinninnerup kingorna ataatsimiititaliap siunnersuut misissorpaa.

Siunnersuutip imarisai siunertaalu

Siunnersuutikkut aningaasalersuineramik ingerlataqarneq pillugu inatsimmik nutarterisoqassaaq kiisalu aningaasalersuisarnermi suliffiit ilaasa allatut ilusilersornissaat atorunnaarsinnissaallu pillugu inatsit nr. 333, 31.marts 2015-imeersoq Kalaallit Nunaannut atuutsinneqalerluni. Nunat tamat akornanni aningaasalersuisarnermut malittarisassianut kingullernut Kalaallit Nunaanni aningaasalersuisarnermik inatsisinik naleqqusaanissaq siunnersuummik siunertarineqarpoq.

Siunnersuutip Inatsisartuni siullermeerneqarnera

Siullermeerinninnermi siunnersuut siamasissumik taparserneqarpoq. Inuussutissarsiormermulli Aatsitassanut Ataatsimiititaliap siunnersuummik sukumiinerusumik nalilersuinissaa siunertaralugu siunnersuut ataatsimiititaliamut suliassanngorlugu innersuunneqarluni.

Tusarniaaneq

Tusarniaanermut atatillugu maluginiarneqarpoq, Kalaallit Nunaanni aningaaseriviit patajaassusiannut annertusisamik piunasaqaateqartoqalerneranik siunnersuut nassataqarsinnaasoq. Aningaasalersuisarnermulli suliassaqaarfimmi suleqatigiinnerup siamasissup attatiinnarneqarnissaa eqqarsaatigalugu naleqqussaanerit tunngaviatigut pisariaqartutut nalilerneqarput. Kalaallit Nunaanni aningaasalersuisarnermik suliassaqaarfiup Danmarkimi Europamilu aningaasaliisarnermik suliassaqaarfimmi najoqqutarineqartut assinginik malittarisqaarluni ingerlatsinissaa siunnersuutikkut qulakkeerneqarpoq.

Sassartitaqarfigineqarneq

Ataatsimiititaliaq siunnersuummik matuminnga suliarinninnerminut atatillugu sulisartut soraarnerussutisiaqalernissamut aningaasaateqarfiannit SISA-mit aallartitanik sassartitaqarfigineqarpoq, tassani SISA-p malittarisassat atuuttut malillugit pinngitsoorani soraarnerussutisiaqalernissamut katersinnermut aqqissuussinnermik Inatsisartut inatsisaatigut nr. 21, 28. november 2016-imeersukkut atulersinneqartumik isumaginnittuunissamut akuerineqarsinnaanngitsoq nassuiaatigineqarluni. Tamanna tunngavigalugu aningaasalersuisarnermut inatsisip allanngortinneqarnissaata sulissutigineqarnissaa SISA-mit siunnersuutigineqarpoq, taamaalilluni SISA maannakkutut ingerlatseqatigiiffittut aqqissuussaanini tunngavigalugu tamatumunnga periarfissinneqarluni.

Immikkoortoq manna kiisalu aningaasalersuinnermik ingerlataqarneq pillugu inatsisip allanngortinneqarnissaanik SISA-p kissaataa immikkoortillugit isigineqassammata aammalu UPA2019/211-mik suliarinninnermut atatillugu SISA-mit kissaatigineqartoq malinniarlugu allannguutissatut siunnersuummik ataatsimiititaliaq Naalakkersuisulluunniit saqqummiussisinnaanngimmata ataatsimiititaliamit eqqumaffigineqarpoq. Aningaasalersuinnermik ingerlataqarneq pillugu inatsimmik allannguisoqassappat kingusinnerusukkut Kalaallit nunaannut atuutsinneqalersussamik Folketingimi immikkut inatsisiliortoqarnissaa pisariaqassaaq.

Ataatsimiititaliarli erseqqilluinnartumik isumaqarpoq tamanna piaarnerpaamik aallartinneqartariaqartoq, taamaalilluni pinngitsoorani soraarnerussutisiaqalernissamut aqqissuussinnermik aqutsinissamik neqerooruteqartitsinissami Kalaallit Nunaanni soraarnerussutisiaqalernissamut aningaasaateqarfituaasoq peqataasinnaanngortillugu, tamatumani ilaatigut siunertarineqarluni neqerooruteqarsinnaasut sapinngisamik amerlanerpaanissaat.

Taamaammat ataatsimiititaliaq aningaasalersuisarnermut inatsimmik Kalaallit nunaanni atuuttumik naleqqusaanissat pisariaqartinneqartut aallartinneqarnissaat siunertaralugu piaarnerpaamik danskit naalackersuisuinut saaffiginnittoqarnissaanik kissaateqarnermik saqqummiussilluni Inuussutissarsiornermut Nukissiuteqarnermut Ilisimatusarnermullu Naalackersuisumut saaffiginnippoq. Inatsisissatut siunnersuummik suliaqartoqarneratigut apeqqutip qulaajaaffigineqarnissaa siunertaralugu danskit naalackersuisorilerumaagaannut saaffiginnittoqalersaartoq Naalackersuisut ataatsimiititaliamut uppersarparaat.

Suliap ingerlanera pillugu ilisimatinneqartarnissaq ataatsimiititaliamit kissaatigineqarpoq, Naalackersuisunullu inassutigineqarluni Danmarkimi naalackersuisussat inissereerpata piaartumik inatsisiliorneq aallartinneqarsinnaaqqullugu pisariaqarpat danskit oqartussaasuinut atassuteqarnermik maannangaq aallartitsereeqqullugit. Taamak iliornikkut UKA2019-imi inatsimmik nutartikkamik suliarinnissinnaaneq ataatsimiititaliamit naatsorsuutigineqarpoq.


Siunnersuutip aningaasaqarnikkut kingunissai

Siunnersuutip piviusunngortinneqarnermini aningaasaqarnikkut kingunissai siunnersuummut nassuiaatini nalinginnaasuni allaaserineqarput. Ataatsimiititaliaq saniatigut allanik ilanngussaqaqqanngilaq.

Ataatsimiititaliap inassuteqaatai

Ataatsimiititaliap **isumaqatigiittup** siunnersuutip **akuersissutigineqarnissaa** inassutigaa.

Ataatsimiitaliap taama oqaaseqaateqarluni isumaliutissiissummilu allassimaneratut paasinnilluni siunnersuut aappassaaniigassanngortippaa.




Henrik Fleischer
Siulittaasoq

For



Múte B. Egede
Siulittaasup tullia



Hermann Berthelsen



Aqqalu Jerimiassen



Randi V. Evaldsen



Peter Olsen

Tillie Martinussen